

欽定大清會典事例

欽定大清會典事例卷九十八

吏部

處分例 書役

書役。

國初定凡在外大小各衙門有侵剋錢糧婪贓之

衙役遇

赦免罪者如復入衙門著役被旁人出首者將復令
入役官以知情縱令論革職其不題叅之督撫
降一級留任如非本任內革役不行查出收用
者本官降一級調用其不查叅之督撫罰俸一

年。○康熙十四年題准在京部院衙門書辦指稱本司事件犯賊將本犯照律治罪外賊數至十兩以上者將該司官員降一級留任不及十兩者罰俸一年。○又題准無司分衙門書吏犯賊該管官均照前例議處如各員有知情縱令作弊者革職有扶同營私婪贓者照貪官例革職提問。○又題准凡正身衙役及額定貼寫幫差之外有白役隨所差衙役嚇詐未經查出之官罰俸六月若官員知係白役於定數之外濫留應役發給牌票差遣公事婪贓累民按其所

犯贓數一兩以下者。將本官降一級調用。一兩以上者降二級調用。十兩以上者革職。○二十年題准。衙蠹害民。令督撫訪拏。司道府州縣等官舉報。若司道府州縣等官不報。上司照徇庇例降三級調用。不行題叅之督撫。罰俸一年。其訪拏衙蠹並贓私數目。年終造冊題報。○雍正四年覆准。各衙門書辦。宗人府令府丞。六部令漢右侍郎。都察院令漢左副都御史。通政使司令漢參議。內閣令典籍。應翰林院令典簿。應詹事府令漢少詹。國子監令漢司業。京堂衙門

俱令漢少卿欽天監令漢右監副太醫院令右
院判六科令漢給事中。中書科令漢掌印中書
專管稽查其內務府理藩院並無漢官。應令內
務府總管理藩院右侍郎專管。

今增為並令貴
成司廳各員稽

查。儘有頂冒家混等弊除將該
吏治罪外專管之員罰俸六月

○又覆准各衙

門考取書吏。細加查覈。毋致有冒籍冒姓頂替
諸弊。其書役投充時。務遵照定例。取具確實親
供印甘各結。方准著役。如無原籍地方官印結
者。不得收用。其年滿送部考職之時。各衙門於
咨內填寫。並無假姓冒籍字樣。吏部方准收考。

若有冒籍冒姓等弊。事發本人革去職銜。照律治罪。其不能稽查之該管官。照失察例。罰俸六月。○又覆准。凡額設書役年滿出缺。該管官員慎擇籤點。取具鄰佑及親族並無重役買缺等弊連名保結。方准收錄。該管官員加具印結。申報上司衙門存案。如有暗行頂買索取租銀之處。將該管官員革職。缺主等按律治罪。儻督撫陽奉陰違。不除積弊。將該督撫照徇庇例降三級調用。○七年議准。外省府州縣各衙門書役投充。務取具並無重役冒充親供互結。該地方

官加具印結。彙造役冊。申送該管稽察衙門。方准著役。每於年終。該役出具並無過犯連名互結。地方官加具印結。申送該管道員衙門。

如無巡道

地方責成守道無道員地方責成按察使今其專管稽查儻有五年役滿不

退者。將該役斥革治罪。或舞文弄法。招搖撞騙。包攬詞訟。侵欺錢糧。該司道訪拏。按律治罪。府州縣官不行查出。照徇情例降二級調用。專管司道不行查出。失察一二名者。罰俸三月。失察三四名者。罰俸六月。失察五名以上者。罰俸一年。失察十名以上者。降一級留任。其司道鹽道

關差書役責成督撫稽查。督撫及總河總漕鹽院書役令各自行稽查。如失察者皆照司道例處分。書吏有指官撞騙招搖作弊。平民畏其本官庇護不敢控告者。許赴該管稽察衙門控告。事實按律治罪。○又議准外省衙門革退書吏將緣事情由及革退日期一併註明。詳報督撫一經犯事發覺。革前革後不難按冊稽覈。如犯事吏役冊上無名。將該管官照造冊遺漏例議處。如規避失察。捏稱革役在先。犯事在後。經督撫查出題叅者。將該管官革職。○又議准在京

部院等衙門缺主。如仍潛匿京城及附近州縣地方。事發將該管地方官議處。失察一名者降一級留任。二三名者降一級調用。四五名者降二級調用。六七名以上者革職。有能實力奉行。拏獲一名者紀錄一次。二名者紀錄二次。三名者紀錄三次。四名以上者加一級。至有罪書吏。逃回原籍之後。仍潛入京城及附近州縣地方。事發亦將該地方官議處。失察一二名者罰俸六月。三四名者罰俸一年。五六名者降一級調用。後改為罰俸二年。又增十名以上者降一級留任。有能拏獲二名者

紀錄一次三四名者紀錄二次五六名者紀錄三次十名以上者加一級。八年議准在外大小各衙門有鄉紳奴僕承充書役者該督撫轉飭該管地方官查明革除取具並無官僕充當書役印結彙齊送部存案。凡充補書役皆確覈實非官僕取具鄰里押結地方官加具印結申送上司報部存案。儻有實係官僕捏稱農民充當其主知而不行首明者照徇庇例降三級調用。又議准各省衙役犯賊本官知情故縱者照縱役犯賊例革職其止於失察實無知情故

縱者。照在京部院司官之例。十兩以上者。將該管官降一級留任。不及十兩者。罰俸一年。令各省督撫於題參疏內。將本官或係知情故縱。或係失於覺察。詳悉聲明。分別議處。○十一年議准。凡各衙門官員。如有聽信請託。將役滿及革退書役。聽其更易姓名。改移籍貫。濫准入冊。及挂名曠役。營求批准等弊。別經發覺。如係役滿革退書役。本官明知故縱。濫准入冊。將本官照革役復入衙門例。革職。其役滿革役。本官實不知情。止係一時失察。准其承充者。降一級調用。

如係挂名曠役營求批准將本官照徇庇例降三級調用。儻前官將役滿革退書役及挂名曠役濫准承充接任官未經查出揭報經上司查出如係役滿革退書役將未經查出之接任官降一級調用。如係挂名曠役營求批准將未經查出之接任官降一級留任。○十二年議准各部院衙門役滿書吏於考定職銜後即由五城司坊官限一月內令其回籍。儻司坊官將冊內有名之人不行催令回籍容留在京並復行來京潛住將容留之司坊官照容留廢官例按名

數分別議處。其各部院衙門責革書吏亦交與該司坊嚴催令於一月內起程回籍並行文本籍地方官嚴行管束。如潛住京城將容留之司坊官亦照容留廢官例議處。儻實係失於覺察以致役滿逗遛或業經催令回籍復來京潛住者照失於覺察例罰俸一年。其籍隸大宛二縣者令該縣將各役年貌住址三代墳墓造冊咨送都察院令該城御史按冊確查。果係本京籍貫有墳墓房產可據者仍准其照例居住。其實非大宛籍貫儻有潛住招搖等弊經該御史查

出。將濫送冊結之知縣。照造冊外錯例。罰俸一年。如該城御史不行查出。一經發覺。將從前失察之該御史。照不行詳查例。罰俸六月。○乾隆元年。覆准在京各衙門書吏額缺。務令承充之人。報明實在籍貫。取具同鄉書吏保結。將原籍何處。並現在居址地方。三代姓氏。於結內詳細聲明。該衙門務於十日內。照保結內所開籍貫居址。三代姓氏。咨行吏部。轉行各該省督撫。嚴飭該地方官。於文到日照例。出具印結。並取具鄰族人等甘結。照各省地方遠近。順天府定限。

四十日。直隸奉天。山東。河南等省。定限三月。江蘇。安徽。江西。浙江。湖北。湖南。陝西。甘肅等省。定限四月。福建。四川。廣東。廣西。雲南。貴州等省。定限六月。務於所定限內。將印甘各結咨送到部。轉送各該衙門。以結到之日。准其著役。仍令該督撫飭令該管上司稽查。如該地方胥吏人等。抑勒遲延。不依限出結者。除將勒索之書吏計。贓治罪外。仍將該地方官照失察衙役犯贓例。分別議處。若係該地方官抑勒遲延。即將該地方官照抑勒遲延例。降二級調用。如無抑勒情。

事遲延者仍照事件遲延例議處

今增為不及一月者罰俸

三月。一月以上者。罰俸一年。半年以上。罰俸二年。一年以上。降一級留任。該管上司

不行稽查督催。照督催不力例。罰俸六月。儻有外省書吏捏稱大宛二縣土著之民。該地方官不行詳查。朦朧出結。將濫行出結之地方官。照頂冒出結例革職。○又

諭朕維州縣為親民之吏。自宜廉平不擾。懋著循聲。乃獄訟催科之際。官民情意。易致睽隔。百姓潛受苦累。而無由自訴者。則以書役之為害甚劇。州縣官不知所以振刷而剔除之也。朕訪聞直省州縣衙門。經承

之外必有貼寫。正役之外。每多白役。聚此數十輩。無賴之徒。假託公務。橫肆貪饕。其為小民擾累。何可勝言。故有獄訟尚未審結。而耗財於若輩之手。兩造已經坐困者矣。額糧尚未收納。而浮費於催徵中飽於蠹胥。已什去二三矣。其餘勾緝命盜。因緣舞弊。遇事風生。株連無辜。賄縱要犯。大率貼寫白役之為害居多。各直省督撫務宜嚴飭各該州縣。將所有吏役。按籍查考。其有私行冒充者。悉行裁革。設正額書役。實不敷用。不妨於貼寫幫役中。擇其淳謹者。酌量存留。亦必嚴加約束。毋得非時差擾。至於經承正役。務須

時刻稽查。儻有壞法擾民之事。立即按法重懲。庶使若輩知所顧忌。不得肆其伎倆。儻或明知故縱。姑息養姦。又或喜其巧於趨承。受其蒙蔽。此則不愛百姓而愛吏役。即屬戕害吾民之甚者也。為民父母。其忍出此乎。且書吏之為害。不止州縣衙門已也。凡徵解錢糧。上司書吏向州縣書吏索取費用。因而縣吏假借司費。紙張名色。派索花戶。又如徵解漕糧時。糧道衙門書吏需索縣吏規禮。因而縣吏遂勾通本縣家人。盤踞倉廩。於正額外多收耗米。稍不遂意。百般留難。遠鄉小民。以得收為幸。守候為難。不得不飽其貪。

壑。又聞院司衙門。凡州縣申詳事件。每先發各房書吏擬批送籤。書吏從此作姦射利。遲速行駁之間。得以上下其手。蓋衙蠹之為擾。自上及下。正不自州縣始也。是在為督撫者。整肅紀綱。立閩省之表率。而監司守令。各奉厥職。互相糾正。則弊絕風清。民安衽席。朕惠養黎元之思意。得以周浹閭閻矣。○又覆准藩臬衙門。於州縣事件。原可行文催取。一經差提。則差役經過所屬地方。及承辦州縣。逢迎餽送。紛紜滋擾。為害甚大。嗣後差提。應永行停止。以免紛擾。如敢故違。令各督撫將失察徇庇之該

管官分別查叅。○二年議准各衙門於正額書役並酌增之貼寫幫役外。復行多留者。降一級留任。○四年

諭在京各部院之弊。多由於書吏之作姦。外省有一事件到部。必遣人與書吏講求。能飽其欲。則引例准行。不遂其欲。則藉端駁詰。司官庸懦者。往往為其所愚。而不肖者。則不免從中染指。至於堂官事務繁多。一時難以覺察。且既見駁稿。亦遂不復生疑。以致事件之成否。悉操於書吏之手。而若輩肆行無忌矣。朕思此等弊竇。在京難於查察。而在外省則情節顯然。某

事用費若干。某項係何人經手。或督撫著人料理。或藩臬等著人料理。而督撫亦未有不知者。使為督撫者。嚴正持躬。深知大體。不為宵小之所搖惑。而遇有部書需索之事。即據實奏聞。寘之於法。則若輩自知所畏懼。乃自督撫藩臬等。以為所費不多。何必與之較量。止圖案件之完結。遂樂為應付而不惜。甘為容隱而不言。無怪乎姦胥猾吏。以詐騙為得計。視國法如弁髦也。內部之書吏。索之督撫。而督撫應之。則彼此效尤。無所底止。必至督撫之書吏。索之司道。司道之書吏。索之府縣。層累而降。受其害者。仍在吾民也。

蓋未定養廉以前。外官尚有贏餘。以供意外之費。既定養廉以後。更無餘資。以應苛索。不取之百姓。將誰取耶。各督撫均有澄清吏治。移風易俗之職任。豈可視為相沿陋規。而躬自蹈之。以為官吏之倡。貽閭閻之困乎。嗣後著嚴行禁止。藩臬以下經手之案。著督撫嚴查禁約。儻書吏有仍前需索者。督撫即時奏聞。如有不遵朕旨。私相授受者。必將與受之人。照枉法贓治罪。督撫容隱不奏。亦必嚴加議處。各省關差鹽政織造提鎮等官。俱著照此旨一體遵行。○又覆准

凡衙門胥役。閱歷愈久。則貪詐愈甚。況年至七

十。刑不加身。流徒杖笞。例得收贖。是彼得倚年老為護符。以遂其貪詐之計。嗣後內外大小衙門。凡一應在官人役。於著役日。取具的實年貌。填寫印簿。存於該管官署內。如年至七十。即令其罷役。不許充當各項差使。如有設法盤踞。改易年歲者。嚴察分別治罪。○又奏准在京各衙門吏役犯贓。該司官員失於覺察。及後雖經自行訪出。而承辦案件。已屬錯誤者。仍照例分別議處。其有案件並無舛錯。而書役在外指騙得贓。該司司官能首先訪出究治者。紀錄二次。其

會同稟究之同司各官亦免其議處。○五年奏准在京各部院衙門書吏凡外省府州縣民人充役者若係各衙門事簡書吏及宗人府律例館供事統俟五年役滿該衙門咨部考職由部彙至三月考試一次考試之後即將該書吏姓名籍貫造冊咨送都察院轉交五城司坊官務令一月內回籍取具印結送院存案仍行文該書吏原籍督撫取具地方官到籍日期印結送院備案至內閣即用供事及各部院衙門繁缺即用書吏亦於役滿之後該衙門出具考語咨

送到部。掣定職銜。照例行文。該衙門飭令回籍。其中有情願揀選人員。該書吏呈明本衙門。咨送到部。照例三月揀選一次。揀選之後。亦即將該書吏姓名籍貫造冊。咨送都察院。轉交五城司坊官。亦限一月內令其回籍。○十二年覆准各衙門書吏。如有不入科房。並將案卷不收存衙署。攜歸私室等弊。該管官不行查出。照約束不嚴例降一級調用。今增為自行查出完辦免議。失於覺察。仍照例議處。

○二十八年覆准外省各衙門未滿典吏混戴帽頂。除將本人照例治罪外。本管官未經查出。

照失於查察例罰俸一年。儻有意故縱照徇庇
例降三級調用。地方官不能查出亦照失於查
察例罰俸一年。若已經查出瞻徇情面不即舉
報將地方官照徇情例降二級調用。又覆准
各衙門凡有差票事竣即宜隨時查銷如遇封
印而案未完結於封印時將票暫行繳銷俟開
印差拘另行給票如不將差票隨時查銷以致
衙役有持票恐嚇鄉民釀成事端者將該管官
照約束不嚴例降一級調用若止於詐贓照失
察衙役犯贓例不及十兩者罰俸一年十兩以

上者降一級留任。如無恐嚇滋事及犯賊情弊。止將差票遲延不行查銷者。將該管官照事件遲延例議處。○又覆准各州縣民壯。令該廳員按年查閱。並令知府於盤查日。遇便點驗。如有不知技勇及老邁殘弱充數者。府廳即會同揭報請叅。將玩忽之州縣。照濫留衙役例降一級留任。如知府捕盜廳員。於州縣民壯有不知技勇濫留應役不行揭叅。均照奉行不力例罰俸一年。○又覆准各州縣有將差票故賞衙役及衙役討賞承票者。責成道府不時稽查。遇有需

索詐贓等弊。將州縣官照故縱例革職。道府自行訪聞揭叅者免議。如不行查出。別經發覺。或經院司查出。將知府直隸州降一級留任。道員罰俸一年。○三十年奏准。督撫等除經制衙役外。不得私自添設儲將。隨征戎旗傳宣。轅門材官。聽用長隨。在標效用。如該督撫等不行裁革。私自留用者。將該督撫等俱照徇情例議處。○又奏准。文職衙門吏役。遵照經制名數補用。仍由該地方官出具。並無復設白役分頂合夥印結。更於年底照經制名數。註明更替著役年

月並役滿日期。彙造總冊。送部存案。儻該管官徇庇濫用。仍有吏役分頂合夥。及捏名倒提年月等弊。將該管官降三級調用。○又奏准各處司府州縣衛所等衙門。主文書算快手。皂隸總甲。門禁庫子人等。久戀衙門。說事過錢。把持官府。飛詭稅糧。起滅詞訟。陷害良善。及賣放強盜。誣執平民。事發按律治罪。本管官明知故縱者。革職。失於覺察者。照失察各本例議處。○又奏准。民間犯罪。未經到案。即向上司衙門。暗擡年月。夤緣挂名者。許地方官一面差提。一面申報。

上司即行斥革。如上司知係挂名倒提年月。庇護不行斥革。及地方官不行差拘。並不詳明斥革。反為開釋者。均照徇庇例降三級調用。○又奏准各部院衙門票傳五城司坊官各項差務。儻各司坊總甲。有藉端需索民間鋪戶者。按律治罪。該司坊官失於覺察。照失察衙役犯贓例議處。若知情故縱。照縱役貪贓例革職。今增為自行查出完辦者免議。○又議准役滿書辦考受職銜。如有犯罪。係知法故犯之人。該地方官將所犯情由申報該管上司轉詳督撫咨部革去職銜。照所犯

罪名。加凡人一等治罪。○三十一年奏准各省藩司衙門書吏照臬司衙門一體關防。按班遞換。令各督撫不時稽查。如有不將書吏封鎖署內。任其出入者。將藩司照違

制律降四級調用。○三十四年奏准京外簡缺書吏役滿。責令各該衙門嚴密考試。自行錄取。將原卷封送吏部。○三十七年覆准。刺字革役。濫准承充。將本管官革職。督撫不行題參。降一級留任。接任官於前官已刺蠹役復充。不行查出。及收用前任隔屬已刺革役。均降二級調用。督撫

以該廳將伊選充差役實大錯謬。各省吏胥人等雖屬微賤。但一經在官。俱各有應辦公務。無論書吏承行稿案。兼司繕寫。非年幼者所能經理。即差役有緝捕人犯。行刑管解之責。亦非年未及壯。膂力軟弱者。可以充當。可見外省於召募書役等事。全不實心。慎選率點充數。甚至任聽賣緣鑽刺。將年幼無知之人。徇情籤派。以致婪贓斃命。釀成事端。今思此事於吏治大有關係。不可不嚴切申明。各督撫務宜通飭所屬。嗣後召募書役。務須遴選老成強幹之人。不得以年齒太輕者濫行充。如再陽奉陰違。一經發覺。所

有該管之督撫各上司亦當從重議處決不寬貸○
又奏准外省吏役將年幼之人充當者本管官
照不行裁革充役例降二級調用專管稽查之
司道降一級留任督撫罰俸一年○嘉慶五年
奏准地方官所差衙役將拘提審訊之犯私用
非刑拷逼致死者將該管官降二級調用若未
用刑拷逼而正犯及該犯家屬有因陵逼嚇詐
情急自盡者將失察之該管官亦降二級調用
其止於用刑拷逼索詐銀錢勒逼教供未經致
死人命者將該管官降一級調用或未經拷逼

索詐但因藉差滋事釀成人命者該管官亦降
一級調用並未奉差因別項滋事釀成人命重
案者該管官亦降一級調用滋事未釀命者該
管官降一級留任係已革衙役及地方總甲保
正鄉約甲長墟長社長等一切在官人役滋事
釀命者亦降一級留任滋事未釀命者罰俸一
年今增為如已經釀命地方官雖訪拏究辦仍
照例處分未經釀命地方官能自行查出究
辦者免議故○又奏准各省大小衙門將不在
公之人作為挂名書吏者降三級調用今改為
知情者
降三級調用不知接任官不行查出降一級留
情者降一級留任

任。如係刺字革役挂名。接任官降二級調用。

又

諭內外大小各衙門充當書吏之人。遇事需索使費。日久竟成陋規。所得陋規逐漸加增。因而書吏役滿。繼受之人出錢頂補。名曰缺底。此等名目。本干例禁。亦且貽累軍民。所關匪淺。現當綱紀肅清。地方官諒不敢仍蹈故轍。有意姑容。但恐日久懈生。復有前項情弊。著通諭各省督撫。嚴行禁革。儻陽奉陰違。別經發覺。或被科道糾參。定將各督撫嚴議。○又

諭內外衙門書吏。積慣舞弊。最為惡習。外省各官遇有

題升調補議敘議處報銷各項並刑名案件每向部
中書吏賄囑書吏乘機舞弊設法撞騙是其常技至
運京餉銅顏料各項解員尤受其累自投文以至批
迴稍不滿欲多方勒掙任意需索動至累百盈千名
曰部費公然斂派即督撫亦往往明知故縱至外省
督撫藩臬以及州縣各衙門凡應辦事件亦不能不
經書吏之手藉端滋弊甚至上下勾通均所不免現
當吏治肅清之時豈容猾吏蠹書從中播弄嗣後各
省官員務須正己率屬廉潔自持嚴明馭吏汰除冗
散懲創姦胥以杜外省書吏之弊在京各部院堂官

惟當督飭司員等每事躬親熟觀例案實心勤職儻有積猾吏胥密訪得實即行嚴辦以杜在京書吏之弊儻經此次訓諭之後內外各衙門仍視為具文尚有前項情弊別經發覺或被科道糾叅必將該管各官分別議處毋謂詰誡之不豫也○又

諭朕恭聞

皇考高宗純皇帝實錄以在京各部院之弊多由於書吏之作姦司官庸懦者往往為其所愚而不肖者則不免從中染指堂官事務繁多一時難以覺察以致事件之成否悉操於書吏之手飭令各督撫嚴行查

禁仰見我

皇考整飭吏治懲創姦胥之意朕上年因內外各衙門多不免有猾吏蠹書串通弄法之事明降諭旨令一體秉公查辦但思部中書吏藉端需索總以例案為辭外省承辦事件原有例案可稽何難詳細檢查循照辦理若本係合例事務又何慮部中指駁焉有內外准駁事權全憑一二猾吏之手最為錮習特再明切申諭各部院堂官務宜督飭司員每事躬親查覈嚴防弊竇其各省督撫如遇書吏等有仍前訛索者即時奏聞寘之於法庶作姦犯科之徒知所做惕儆

經此次訓誡後內外衙門視為具文仍不認真查察
仍聽若輩勾通舞弊別經發覺惟該堂官各督撫是
問○又

諭上年將關稅贏餘酌加裁減原以體恤行旅加惠商
民在各監督等自當仰體朕恤商惠民之意不敢於
正稅之外復有勒索擾累之事而所派之巡役家人
等難保無肆意苛求藉稽查稅務之名妄行勒捐情
弊現在盧溝橋彰儀門經管稅局人役竟有訛索過
往行人銀錢等事業經分別懲治輦轂之下尚敢如
此其餘各省關稅種種情弊不問可知該監督等所

原欲使在官吏役人等知舞弊終當敗露法網非可
倖逃共相儆畏不致再蹈刑章所謂辟以止辟正朕
明刑弼教之苦心乃辦理甫閱數旬且陶源一犯經
該省續行緝獲正法為日無幾此在相距較遠省分
或尚未聞知而近在同城之書吏復有此等需索酬
謝偽造劄付假與人官之事實屬啓不畏死試思書
吏等俱有身家性命卽一時利欲薰心寧不稍知顧
畏何作姦犯科竟甘身冒嚴刑至於此極迨一經破
案爰書既定卽朕慎重人命思欲寬以一綫而不能
此輩蠢愚冥頑致罹重辟既為可恨亦屬可憫嗣後

大小官員當剴切曉諭吏役人等以直隸省前案及此案為鑒務各自顧身命守法奉公毋再舞文作弊陷於重罪以期吏治漸就肅清方不負朕諄諄訓誡之意○道光二年奏准內外大小衙門書役犯贓除

本犯照例治罪外本管官如通同婪索不論銀數多寡皆革職提問若縱令作弊得贓亦不論銀數多寡皆革職其止係失於覺察如犯該杖徒者本管官罰俸六月犯該軍流者本管官罰俸一年犯該斬絞者本管官降一級留任俱以首犯之罪名為斷自行訪拏究辦者免議○又

議准。書役犯贓脫逃。將本管官先照犯該軍流例。罰俸一年。俟日後獲犯審明。再照罪名輕重改議。○又議准。在京各衙門書役犯贓。如係舞文弄法。案件舛錯。該司員失於覺察。犯該杖徒者。罰俸一年。犯該軍流者。降一級留任。犯該斬絞者。降一級調用。俱以首犯之罪名為斷。自行訪拏究辦者。免議。○又議准。蠹役得贓。承審官已將索詐實情審出。故為改重就輕者。革職。十年。

諭。御史王瑋慶奏。請裁革州縣白役一摺。直省州縣額

設官役原有定數。即使繁要州縣。事務較多。不能不量招散役。備供使令。然須定以限制。豈容影射滋弊。擾累閭閻。若如該御史所奏。山東州縣差役。大縣多至一千餘名。小縣亦多至數百名。一省如此。他省可知。此等白役。遇事生風。在官多一巨猾。即地方添一積蠹。不惟鄉愚受其魚肉。該管官亦何以稽察。亟應嚴行裁革。前此直隸省。因各州縣挂名吏役過多。經那彥成奏請。以八十名為限。當經降旨允准。各省州縣。俱應仿照辦理。著各該督撫酌量州縣缺分之繁簡。嚴定章程。大加裁汰。至繁地方。差役不准過八十。

名其餘事簡地方。以次遞減。編立卯簿。具報該省督撫。責成該管官及該管上司。嚴行稽察。所有白役概行禁革。儻仍私自容留。該管官漫無覺察。從嚴叅處。如該管上司及該督撫查察不周。仍屬有名無實。將來別經發覺。必當執法嚴懲。決不寬貸。○十五年

諭給事中常大澍奏。州縣額設民壯。請簡募充補。勤加訓練等語。民壯一項。以守護倉庫監獄。護送過境餉鞘人犯為事。若徒令坐糜工食。為蠹閭閻。名實不符。殊乖立制之意。著各省督撫嚴飭各該地方官。於額設民壯。簡募壯丁充補。勤加訓練。如有不知技勇。及

老弱充數者。責成該管知府。照例揭叅示懲。以戢姦
頑而資捍衛。○二十六年奏准。各直省大小衙門書
吏。俱有定額。不准擅自增益。令各督撫實力稽
察。一有挂名典吏。即嚴加裁汰。如正額典吏實
不敷用。准其視地方之繁簡。量設幫書。著為定
額。將幫書姓名籍貫。充役日期。隨同正額書吏。
造冊咨部。僅於正額書吏。及幫書定額之外。有
私增濫設情弊。由該督撫查叅。均照內外各衙
門經制書吏之外。尚有多留例。將該管官降一
級留任。○又奏准。各衙門書吏缺出。限一月內

即行充補。於年終彙造總冊。聲明充補月日報部。如已滿書吏。於限外仍復懸缺未補。由該督撫分別查叅。如係現充之人。懸缺把持。照府州縣衙門書吏久戀衙門把持官府例。將該管官分別議處。如僅止充補遲延。照事件遲延例議處。咸豐五年奏准。書差勒索平民。及例應拘提之案。索詐得贓。致斃人命。如本管官知情徇隱者。革職提問。未經致死。知情徇隱者。降三級調用。又奏准。解犯進省。如有上司衙門書差藉端勒索規費。許該州縣直揭上司。立即嚴拏。

懲辦。儻該州縣瞻顧容隱。別經發覺。照徇庇例。降三級調用。○又議准。地方官故縱衙門滋事者。革職。○又議准。內外各衙門書吏。俱應確查身家清白。取具鄰里押結。加具地方官印結。詳咨吏部存案。如有身家不清。地方官於出結後。查明稟揭者。免議。未經查出。降二級調用。若係由宦僕子孫承充。其主知而不首。係官降三級調用。不知情者。免議。○又議准。內外各衙門書吏。務擇年過二十。老成馴謹之人。充補實缺。若今年幼者承充。本管官降二級留任。○又議准。

大小衙門。一切自理案件。有應行批示。准駁之件。該管官即親自批示。如今書吏擬批。以致作弊者。照故縱書吏舞文弄法例。議處。○又議准。藩臬衙門書吏。該司務嚴密關防。按班遞換。如有不將書吏封鎖。任其出入自由者。照違

制私罪創革職。失於覺察者。降一級調用。○又議准。府州縣衙門書吏。責成巡道稽查。無巡道地方。責成守道稽查。無道員地方。責成按察使稽查。儻有久戀衙門。把持官府。舞文弄法。招搖撞騙。說事過錢。包攬詞訟。侵欺錢糧。飛詭稅糧。賣放

強盜誣執平民等弊。該司道即訪拏治罪。係本
管官故縱者。革職。如止失於覺察。犯該杖徒者。
降一級留任。犯該軍流者。降一級調用。犯該斬
絞者。降二級調用。總以首犯之
罪名為斷司道失察者。每
案罰俸一年。其藩臬道員運使關差書吏。責成
督撫稽察。督撫及總河總漕學政鹽院書吏。責
令自行稽查。如有失察者。每案罰俸六月。若本
管各官自行訪出究辦。均予免議。又議准。直
省經制書吏年滿缺出。如有暗行頂買。索取租銀
者。將缺主人等按律治罪。該管官故縱者。革

職失察者降一級調用。該督撫知而不參。降三級調用。不知情者免議。○又議准。各衙門官員。於本任內已革已滿書役。如有更易姓名。改移籍貫承充。知情者革職。失於查察。照不行裁革。完役例降二級調用。接任官不行查出。降一級留任。若收用前任及隔屬已滿已革書役者。降一級調用。○又議准。凡衙役致死人命。致釀人命之案。地方官雖咎止失察。俱應照例議處。該督撫隨案附參。不得以訪拏究辦為詞。冀邀寬免。若但滋事而無人命。地方官能自行查出究

辦者免議。○又議准。人犯到案。地方官務先查驗。有無拷逼傷痕。如有痕據。即將該差役訊明治罪。若不行查驗。別經發覺。降三級調用。○又議准。前官任內有著名衙蠹。後任官能查出究辦。或拏獲鄰境衙蠹。罪應杖徒者。每名紀錄一次。罪應軍流者。每名紀錄二次。罪應斬絞者。每名加一級。○又議准。番役拏獲人犯。限即日送交營弁。轉送步軍統領衙門審訊。僅有不即送官。羈留鎖押。拷逼勒索。私行取供。該管官自行查出究辦者。免議。如別經發覺。係誣良而已致

死者。將該管官革職。上司罰俸一年。係誣良而
未致死者。將該管官降三級調用。上司罰俸六
月。若將例應緝拏之犯。鎖押拷逼。已致死者。該
管官降二級調用。未致死者。該管官降一級調
用。其有得財縱放者。該管官照失察書役犯贓
例議處。如止係私行取供。並無拷逼勒索情事。
將該管官罰俸一年。其五城坊捕。屬御史管轄
者。亦限即日交送該管官。轉送巡城御史審訊。
如有獲犯滋弊。悉照前例議處。

欽定大清會典事例卷九十九

吏部

處分例

編審人丁賣人口

滿洲營雇

用漢人

買

臺灣民人偷越番地

開墾荒地

編審人丁○康熙二十五年題准各省五年編
審壯丁一次統於年終造冊具題如不照限題
報者將經管各官皆照違限例議處如府州縣
官假編審造冊科派小民者革職提問司道等
官明知蒙隱不報者亦革職提問若揭報督撫
不行題參或被百姓首告或被科道指參將督

撫亦革職。○五十二年欽奉

恩詔續生人丁。永不加賦。如該府州縣各官於定額之外。將新增人丁。私派錢糧者。革職提問。司道等官不揭報督撫不查叅。皆照私派例分別議處。○乾隆五年

諭周官之法。歲祭司民司祿。而獻民數穀數於王。王拜受之。登於天府。非獨冢宰據之以制國用之通。凡授田興鋤。調急平興。以及歲有災祲。移民通財。薄徵散利。皆必於民數穀數。若燭照數計。而後可斟酌調劑焉。秦漢以降。戶口之數。雖間見於史冊。而其文甚略。

惟唐貞觀之初。定口分世業之法。比歲登籍。三年獻書。以養以教。致治之盛。幾於成康。固用此為根柢也。在昔

聖祖仁皇帝。以生齒日繁。恐有司屢加丁賦。匿不以聞。特詔據實開載。新增人戶。不另加丁賦。

世宗憲皇帝。勤恤民隱。廣儲倉穀。常懼一夫不得其所。德意至為周渥。然各省督撫。雖有五年編審之規。州縣常平倉。雖有歲終稽覈之法。而奉行者。竟亦於登耗斂散之間。循職式之舊。殊不知政治之施設。實本於此。自今以後。每歲仲冬。該督撫將各州縣戶口減

增倉穀存用一一詳悉具摺奏聞朕朝夕披覽心知其數則小民平日所以生養及水旱凶饑可以通計熟籌而豫為之備各省具奏戶口數目著於編審後舉行其如何定議令各省畫一遵行著該部議奏欽此遵

旨議定嗣後除五年編審人丁每年奏銷倉穀仍照舊例辦理外應令各省督撫即於辛酉年編審後將各府州縣人丁按戶清查及戶內大小各口一併造報毋漏毋隱其各項倉穀詳覈存用實數俱於每歲十一月將民數穀數繕寫黃冊一

本具摺奏

聞者為定例。儻各該省奉行不善。致有官吏胥役藉端滋擾。科派累民者。立即嚴參究治。○又議准造報民數。每歲舉行於五年編審後。則戶口人丁業有成數。既不難乘便造報。即不值編審之年。各州縣設立保甲門牌。一切戶口俱行臚列。原有冊籍可稽。若除去流寓人等。將土著數目造報。不必更事挨查滋擾。即可得其總數。應令各該督撫於每年仲冬止。將戶口總數與穀數一併造報。毋庸逐戶挨查。細造花名清冊。以免

紛繁擾累。○二十七年覆准出旗人等有情願入順天府屬州縣為民者著該旗造冊將伊等戶口委員解送順天府轉解伊等願入之州縣查收編入里甲給予印票造冊申送備案如遇有違徒貿易等事亦令報明州縣存案若地方官收明不即編入里甲日後查無其人者均照脫漏戶口律分別議處。○三十年奏准凡外省官員將朋友家人寫入伊家口數內誑充戶口者降一級調用。○又奏准官員將投充滿洲之人稱為納糧之民者地方官降一級調用轉申

之上司罰俸一年。巡撫罰俸六月。如先稱不係
投充。後報投充者。地方官罰俸一年。該管上司
罰俸六月。巡撫罰俸三月。如將投充滿洲之人
稱為納糧之民。改糧冊年月移送者。革職。未經
詳查轉申之上司。降一級調用。巡撫罰俸一年。
○三十七年奏准。直省督撫轉飭府州縣等官。
將紳衿之家。一體編次保甲。聽保甲長稽查。如
有不入編次者。該地方官詳報題叅。比照脫漏
戶口律治罪。地方官瞻徇情面。不據實詳報者。
降三級調用。身列仕籍。肄業膠庠。並齊民內哀。

老廢疾及寡婦之家子孫尚未成丁者俱免其充役輪直○又

諭編審人丁舊例原因生齒繁滋恐有漏戶避差之弊是以每五年查編造冊以備考覈今丁銀既皆攤入地糧而滋生人戶又欽遵康熙五十二年

恩旨永不加賦則五年編審不過沿襲虛文無裨實效况各省民數細數俱經該督撫於年底專摺奏報戶部覈實具題付之史館紀載是戶口之歲增繁盛俱可按籍而稽更無藉五年一次之另行查辦徒滋紛擾嗣後編審之例著永行停止○四十年

諭直省滋生戶口。向惟冊報戶部。朕臨御之初。即飭各督撫。歲計一省戶口倉穀實數。於仲冬具摺以聞。蓋仿周禮司民掌登民數。拜獻於王之義。即藉以驗海寓富庶豐盈景象。法至善也。顧行之日久。有司視為具文。大吏亦忽不加察。穀數尚有倉儲可數。而民數則量為加增。所報之摺及冊。竟有不及實數什之二三者。其何以體朕周知天下民生本計之心乎。我國家累洽重熙。百三十餘年於茲。休養生息。盛於往牒。閭閻安享昇平。樂利阜寧。歲計倍有增益。詎可不確覈以登紀。盛世殷繁之實乎。現今直省通查保甲。所

在戶口人數。無難按籍而計。嗣後各督撫飭所屬具實在民數上之督撫。督撫彙摺上之於朝。朕以時披覽。既可悉億兆阜成之概。而直省編查保甲之盡心與否。即於此可察焉。其敬體而力行之。毋忽。○又

諭前曾降旨。令各督撫將實在民數通數上陳。但恐督撫等泥於歲底奏報之期。尚不免草率從事。仍屬有名無實。所有本年各省應進民冊。均著展至明年年底繕進。俾得從容確數。以期得實。嗣後每年奏報民數。各該督撫務率屬實力奉行。毋再如前約略開造。儻仍因循疏漏。察出定當予以處分。○四十九年奏

准督撫彙奏民數穀數有造報舛錯者罰俸三月。

滿洲營雇用漢人。○乾隆二十一年覆准各省駐防官兵雇用漢人。令理事同知查明造冊交地方官查察立案。儻造報不實。並地方官不實力查察者。均罰俸一年。如有姦匪改易姓名竄入潛匿。有心徇隱者。降三級調用。

買賣人口。○康熙三年題准。凡撥給山海關以外叛逆人犯妻子家奴。有私行偷賣贖去者。賣贖之人。係官革職。專管各官。各降二級調用。如

偷賣贖軍流等犯妻子家奴者亦照此例議處。
○十七年覆准八旗滿洲蒙古家人不許賣給
漢軍民人違者將所買之人並價均入官買賣
之人係官罰俸一年收稅官罰俸九月其滿洲
蒙古家人有違例贖身放出為漢軍民人者其
家主係官亦照買賣例處分其喀爾喀額魯特
亦不許賣給漢軍民人違例買者係官降一級
調用將人入官。○十八年議准旗下人契買民
人無論地方著用正印官印信准買令用印衙
門速呈戶部由戶部轉行該撫令該地方官曉

諭如用印官十日內不將所買緣由呈報戶部者罰俸一年如竟不呈報者降一級留任○又議准凡旗下家人將誘來人口隱藏在家販賣其主明知匿而不首者係官革職若不知情失於覺察者罰俸三月若各該管之人或挾獲或出首或犯人自行投首者將該管官並其主皆免議處○又議准官員該管地方如有誘騙掠賣人口藏頓窩子老虎洞等處該地方官不行嚴加查拏知情故縱者革職該管上司皆降三級調用○又議准旗下人買良人為倡或將家

人婦女縱為倡者倡婦入官其主係官革職治罪家人將自己婦女縱為倡者其主不知情係官降一級留任罰俸一年若知情係官亦革職治罪族長係官罰俸一年城外交與五城司坊官查拏若不查拏被旁人拏獲將司坊官罰俸一年該城御史罰俸三月○雍正十二年覆准官媒人等將婦女私養在家糾結匪類局姦圖騙如非係當官交領私具領狀將婦女久養在家踰限不賣希圖重利者該管地方官不行實力查拏或被上司查出或別經發覺將該地方

官照不實力奉行查訪窩家例罰俸一年。○乾隆四年覆准凡違禁掠賣番子之內地民人文武官弁稽查不力者照外國之人私自進口不行查報例專管官降一級調用該管上司罰俸一年。知情故縱者照諱盜例革職受賄徇縱者參革治罪。○又奏准各省誘拐等犯未經審訊即行遠颺地方官如不實力緝拏照不實力奉行察訪盜竊例罰俸一年。人犯照例緝拏。○又奏准官員出差買女人者分別強和察議強娶者革職和娶者降三級調用。○二十四年覆准

地方有興販婦人子女轉賣圖利等事地方官匿不申報照應申不申律罰俸九月○三十年奏准境內有夥衆興販婦人子女藏頓等事該管地方官失察未經查拏降一級調用知情故縱者革職該管上司徇庇不將故縱之屬員查叅降三級調用○又奏准凡奉天錦州二府民人有將子女典賣與別省民人帶去並典賣與旗下者失察之州縣官罰俸九月○五十三年諭地方遇有災祲無業貧民賣鬻子女原屬閒有之事從前田文鏡在河南巡撫任時曾經禁止民人不准

出境其意不過為諱災起見此等貧民既因災歎口
食無資不得已將其子女出賣地方官撫恤得宜無
此等事則善矣概行禁止則災黎貧乏不能自存又
無以養贍其子女必致餓斃豈軫恤災黎之道但民
人子女或就近賣與地方民戶及過往客商固所不
禁即各省赴京引見官員沿途價買攜帶亦尚屬可
行至如由新疆押解人犯照料回子護送哈薩克使
人並押送官物之官員人等俱係由驛站行走理宜
簡便若沿途買帶子女則揀擇看視說合講價既不
免守候需時而價定後沿途攜帶又需多用車輛夫

馬必致擾累驛站貽誤差使且此等買帶子女之人未必盡係自己買用或為人代買或復行販賣更易滋別項情弊而帶領來使之入尤為外藩所笑不可不嚴行查禁嗣後著該督撫等遇有災祲貧民賣鬻子女者除本地方民戶過往客商及並未馳驛官員各聽其便毋庸禁止外其有派委差使由驛行走之人俱應禁止民人不得私行售賣並隨時查察此等官員如有違禁私買攜帶者即應嚴叅治罪將此通諭各督撫並諭伊犁將軍及新疆辦事大臣一體嚴察毋得仍前因循致干咎戾

謹案攜帶子女者照出
差買女人例降三級調

用○嘉慶九年奏准實係夥衆興販藏頓販賣並誘拐嫁賣結夥已在十人以上或被誘之人在五人以上者仍照夥衆興販例將地方官及該管上司按知情失察分別議處若和誘拐逃因而嫁賣其同夥不及十人並被誘不及五人者將失察潛住不行查拏之地方官照夥衆興販例減為降一級留任儻有知情故縱者仍革職該管上司於屬員故縱徇隱不叅者仍降三級調用

迷拐子女○康熙十八年議准京城地方如有

聚衆搶奪路行婦女及以藥餅迷去幼小子女
或用術拐男婦子女或賣或自為奴婢者將不
行嚴禁之該管官罰俸一年在外直省地方如
有搶奪迷拐等事不行嚴禁之州縣捕官罰俸
一年印官罰俸六月本管知府及總捕廳各罰
俸三月至搶奪迷拐人犯之主知情不舉係有
職者革職○乾隆二十五年覆准京城内外地
方有迷失子女之案該管衙門均於報到之日
一面行知内外看守城門官兵層層邏訪加意
盤詰即一面飛飭所屬該管員弁選差躡緝並

通飭內外城附近地方官弁一體稽查嚴緝務獲如該管官弁不即轉報關緝以致遲誤者罰俸一年幼童迷失或逃或拐情節未明俟緝獲之日審係迷拐方行照例分別議處如該管官將迷拐人犯實力緝獲者免其失察處分紀錄一次其別處地方員弁有能盤獲者紀錄二次○三十年奏准八旗迷失幼童幼女令步軍統領各衙門一面通行各直省查緝一面遴選幹捕嚴緝姦拐並收留不報之人果能實心緝獲者該管官按拏獲名數議敘拏獲一二名者紀

錄一次三四名者紀錄二次五六名以上者紀錄三次。儻該地方有窩拐誘拐及收留不報之人該番捕不行查拏將該管官亦按誘拐收留名數處分一二名不行查拏者罰俸六月三四名不行查拏者罰俸一年五六名以上不行查拏者降一級留任。儻姦徒將誘拐之人遠遁他處轉賣經地方官拏獲供出曾在某地方容留者將拏獲與容留之各該地方官亦照在京該管官例按其名數分別議敘。議處。三十四年奏准。境內有搶奪迷拐男婦子女者將不行查

掣之該管司坊州縣印捕各官降一級留任知府直隸州知州總捕廳俱罰俸一年道員罰俸九月○嘉慶十年議定在京五城大興宛平二縣各省州縣地方遇有夥衆搶奪良家婦女及用藥迷拐男婦子女之案令都察院各該督撫勒限四箇月題叅疏防將司坊州縣印捕各官住俸勒限一年緝拏限滿不獲降一級留任限一年緝拏限滿不獲卽照所降之級調用人犯交與接任官照案緝拏督捕廳員並同城知府初叅停升罰俸六月限一年緝拏限滿不獲罰

俸一年。不同城之府州及兼轄道員。初叅罰俸六月。限一年催緝。限滿不獲。罰俸一年。人犯均照案緝拏。限內自行拏獲者免議。如承緝官於初叅限內去任。接緝官初叅。罰俸一年。再限一年緝拏。限滿不獲。再罰俸一年。人犯照案緝拏。如係初叅限外去任。接緝官限滿不獲。罰俸一年。人犯照案緝拏。儻有違匿及事主未報等事。悉照盜案例辦理。如搶奪並非良家婦女。照白晝搶奪賊未滿貫例議處。○又議定。該管官將迷拐人犯實力緝獲者。免其失察處分。准予紀

錄一次。其別處地方員弁有能盤獲者。准其紀錄二次。○又議定。地方有符咒騙誘子女。毀其肢體。炙取腦髓等事。本邑地方官不嚴拏懲治。降二級調用。此等誘騙之人。潛住別邑。將聽其容留窩頓。不行查拏之地方官。降一級留任。

隱瞞秀女。○乾隆三年奏准。旗人隱瞞秀女者。係官革職。平人交刑部治罪。族長知情者。係官降二級調用。係兵丁鞭七十。若不知情。該族長草率具結者。係官罰俸一年。係兵丁鞭五十。在屯之秀女。如有隱瞞遺漏等弊。將差往稽查之

領催照在京族長例議處。○三十年奏准挑選之時遺漏未曾傳知係佐領驍騎校領催遺漏族長家長均免議。若族長遺漏係官罰俸一年。家長免議。在屯之秀女令該驍騎校領催前往稽查。如有隱瞞遺漏等弊在京之族長扶同隱瞞及遺漏不行傳知仍與京城一律處分。族長不知情者照京城之例減一等處分。若族長家長於事後出首將族長家長照京城之例減二等處分。頭面肢體殘疾之女令家長同族長報明該管官送都統等驗明報部。違者家長係官。

罰俸一年。族長係官。罰俸六月。事後出首者。家長。罰俸九月。族長免議。

臺灣民人偷越番地。○乾隆二年。覆准。臺灣民人偷越番地。該地方文武官弁。如有實力巡查。一年之內。拏獲十名者。將拏獲之該地方文武官弁。紀錄一次。再有拏獲。按數遞加議敘。儻不實力巡查。至有偷越之事。別經發覺。將該管文武官弁。照失察民人擅入苗地。例降一級。調用上司。罰俸一年。若有賄縱情弊。照私放出口。例將該管官革職。計贓論罪。如兵役人等。不實力

巡查致有偷越情事。查明兵役有無受賄故縱情弊。將失察兵役之該管文武官弁。係失察照失察衙役犯贓例議處。係故縱照縱役貪贓例革職。

開墾荒地。○順治十五年覆准。丈量地畝遲延限期及丈量之地不明白詳報不送文冊。檄催又不申詳。或飭令該員監丈。互相推諉者。州縣官各罰俸一年。該管官各罰俸六月。○康熙元年題准。各省荒地。道府一年內開墾千頃以上者。紀錄一次。三千頃以上者加一級。四千頃以

上者加一級紀錄一次。六千頃以上者加二級。州縣官開墾百頃以上者紀錄一次。三百頃以上者加一級。四百頃以上者加一級紀錄一次。六百頃以上者加二級。俟起科時該督撫取具甘結具題之日分別紀敘。如有未經開墾捏報者督撫布政使降二級罰俸一年。道府降四級調用。州縣官革職。如墾地後有復荒者道府州縣官將開墾之加級紀錄削去。督撫布政使罰俸一年。道府降一級。住俸。州縣官降三級。住俸。皆勒限一年。督令開墾。如依限一年內有墾完

者准其開復如限內不墾完者督撫布政使降
一級再罰俸一年道府降二級今改為一級調用州
縣官降三級調用如前官墾過熟地後任官復
荒者督撫布政使道府州縣官照經營開墾官
復荒治罪儻有隱匿熟地稱為墾田者道府州
縣官皆照未經開墾捏報例議處如督撫布政
使未經查出亦照捏報例議處○十五年題准
官員開墾荒地不照定例年分起科先期勒徵
或過期不徵或私減地畝定額徵糧者州縣官
革職道府各降三級調用督撫布政使各降一

級留任如不照所限年分豫詳請徵或勒民開墾及開墾地畝以多報少以少報多或以先墾之地後又重報開墾及荒熟地畝不分析明白混報或應徵在民錢糧不查出者州縣官各降一級調用該管上司罰俸一年。○又議准現任文武官並休致鄉宦或將熟地或將新墾增地隱一畝以上者降四級調用隱十畝以上者革職隱一頃以上者革職杖一百准其折贖永不敘用其所隱田地入官所隱錢糧按年行追進士舉人生員貢生監生隱一畝以上者革去職

銜隱十畝以上者革去職銜杖一百准其折贖
永不敘用其所隱田地入官所隱錢糧按年行
追一應州縣官員將所隱田地不行查出不及
二頃者降四級調用二頃以上者革職道府直
隸州知州等官將所隱田地不行查出不及五
頃者降二級調用五頃以上者降四級調用督
撫布政使將隱地不行查出不及十頃者降一
級留任十頃以上者降二級留任罰俸一年又
官員因不行查出隱地處分之時先有查出隱
地並因墾地有加級紀錄者准抵其餘加級紀

錄不准抵銷其地主已將本身地呈報州縣而州縣不呈報司道府官或州縣已經呈報而司道府官不詳明督撫者皆照隱地官員例處分其原首地主免罪總督巡撫以下州縣官以上離任之後如有隱地被接任者查出其升遷降調休致告病者皆照現任官例處分○十六年題准州縣官實心勸諭首出隱地二百頃以上者紀錄一次六百頃以上者加一級八百頃以上者加一級紀錄一次千頃以上者加二級該督撫仍不時查訪如有藉勸首名色滋事擾民

該督撫即指名題叅照捏報開墾例革職○十七年覆准不肖官員有希圖議敘誣報開墾及查出隱地累民多徵錢糧者此等事發覺將誣報官照捏報開墾例議處加級紀錄卓異即升皆不准抵銷○雍正十二年覆准各省督撫凡有開墾冊報即別委隔屬賢員履畝丈勘所墾之數與所報之數果屬相符取結送部勸墾之官准其題請議敘儻丈勘之數與報墾之數不符即將原報墾之官題叅照以多報少以少報多例降一級調用如委勘之員一時蒙混或經

督撫指叅或經日後發覺將委查出結之員亦照此例降一級調用。至於山田或先可耕種後因水衝僅存沙石者難以播種並濱江濱河之田前經報墾後因水浸或經坍塌者應於水田六年旱田十年將屆升科之期令該督撫按年委官覆加查覈。如果有坍塌更改之處據實具題請豁其成熟田地仍行分別升科。如有應行改正而互相徇隱者督撫查叅皆照荒熟地畝不分析明白例降一級調用。升科以後山田水田或彼衝此長彼漲此坍以新長者補衝以新

漲者抵坍實在衝坍者即予開除仍將每年開除抵補細數造冊報部如該地方官不實力奉行督撫確查題叅亦照例降一級調用督撫不題叅別經發覺罰俸一年○又覆准凡藉開墾名色將有業戶田產串通里甲地鄰蒙官給照地方官不行查明濫給執照者照不分析明白混報例降一級調用○乾隆十三年議准沿河沙洲地畝坍漲悉令報官勘驗如此屬淤漲之地實係被處坍塌之數上下對岸顯有形迹可據者即遴委能員會同兩邑地方官據實勘驗

秉公撥補如地方州縣官不查丈明確以致坍少補多坍多補少舛錯不公者照官吏不用心

從實檢踏律分別議處

如如通同作弊罷職不敘如係失於關防計畝數

分別議處罪止降二級留任

○十六年覆准湖廣沿江州縣

兩岸多產蘆葦坍漲不常其坍沒地畝印官竟有從未履丈率行據報請豁道員不過按冊抽查其中不免坍少豁多之弊嗣後嚴飭州縣逐一確切查明入冊道員詳細稽覈儋州縣仍前草率道員訪出揭叅如有扶同一併分別議處儋州縣及道員等仍前玩忽該督撫不即題叅

部中按限查覈將該督撫一併參處○三十年
奏准廣東省山多田少無田耕種窮民赴山搭
寮取香砍柴燒炭等項令各州縣每寮給牌遇
有遷徙消長赴縣添除儻窩藏姦宄勾通匪類
報官究治至入山之窮民赴官報明搭寮居住
種麻種靛山主經官驗准其官山內除搭寮工
作外令民自行耕種該督撫相地制宜分別起
科每年開墾畝數年底造具清冊送部查覈若
地方各官有以多報少勒索情弊照開墾荒地
例議處如文武各官漫不經心約束以致窩藏

姦宄。勾通匪類等弊。革職通詳之上司。免議。○
又議准。入川開墾之民。令原籍地方官。給予印
照。至川繳送該管地方官。以便稽查。其有久住
川省之人。欲往他省探親。或他省之人。欲至川
省探親者。俱令稟明地方官。給照前往。回日取
所往之地方官回文銷照。如無印照。所經過地
方官。即行驅逐。其沿途經過地方官。不能稽察。
以致混行出入者。照失查無票出口。例降一級。
調用。或得賄故縱。或借盤查名色。肆行需索。貽
累平民者。革職治罪。該督撫及該管上司。不行

題叅照不揭叅劣員例分別議處。○四十二年
覆准。粵西官荒地土立石定界之後復有控爭
地土未清案件該撫覈實查叅將從前查勘不
實之州縣官照荒熟地畝不分析明白混報例
降一級調用該管上司各罰俸一年。○道光四
年議准直隸旗荒官荒民荒地畝原報可墾者
一萬一千餘頃勒限一年內即行升科州縣官
能於一年限內全行辦結者加二級如逾限不
結降一級留任仍戴罪限半年趕辦若依限完
結開復降留仍予議敘如再逾限不完即照所

降之級調用。○又議准。原報難墾及未經勘丈荒地七萬六千餘頃。勒限一年招佃試墾。州縣官能於一年限內全行辦竣。數在百頃以內者。隨帶加一級。一千頃以內。墾至七成以上者。隨帶加二級。一萬頃以內。墾至六成以上者。並一萬頃以外。墾至五成以上者。隨帶加三級。二萬頃以外。墾至四成以上者。准該督出具考語。送部引。

見道員知府直隸州知州果能實力督催統計所屬州縣一年限內數在百頃以內全行勘丈招佃

試墾並數在千頃以內墾至七成以上者俱加一級萬頃以內墾至六成以上萬頃以外墾至五成以上者俱加一級紀錄二次二萬頃以外墾至四成以上者俱加二級如有將開墾之地熟後復荒者將該州縣道府等議敘之案註銷○又議准原報難墾及未經勘丈地畝州縣官招佃試墾一年限滿數在百頃以內不及六成者降職一級千頃以內不及四成者降職二級萬頃以內不及三成並萬頃以外不及二成者降一級留任二萬頃以外不及一成者降二級

留任如有逾限不丈及全未墾種者無論頃數多寡均革職留任道員知府直隸州知州如不實力督催統計所屬州縣地畝數在百頃以內不及六成千頃以內不及四成者罰俸六月萬頃以內不及三成萬頃以外不及二成者罰俸一年二萬頃以外不及一成者降一級留任以上降革留任罰俸各員仍再予限一年戴罪趕辦如限內將不及分數墾足者准其開復能墾至議敘分數者除開復處分外仍給議敘若二年限滿無效已罰俸六月者再罰俸一年已罰

俸一年者即降一級留任已降職一級降職二級者即改為降一級降二級留任已降級留任者即照所降之級調用已革職留任者即行革職其有地畝在三萬頃以外者初次先照二萬頃以外之例議敘議處如一年限滿不能辦結再予限二年戴罪趕辦儻三年限滿無效即照二萬頃以外之例辦理○又議准各項荒地內有經旗民人等先已私墾成熟者令各該州縣實力查出於當年升科所有查出地畝即併入招墾數內覈計分數儻前項地內實有水衝沙

壓難以試墾者亦即繪圖貼說出具切實印甘
各結報部查勘情形。改作蘆洲牧廠。○又議准
各州縣官以奉文之日起限令該督先將起限
日期並查丈地畝數目先行報部存案。每屆期
滿之時即將各州縣考成分數覈實奏報。並分
別詳細造冊咨送吏戶二部查辦。○又議准土
棍私租山場招集外來棚民入山開墾。州縣官
不即查拏驅逐者降一級調用。府州降一級留
任。道員罰俸一年。其限滿棚民租契有年限者以契約為斷無
年限者至逾不得過飭令退山回籍。地方官按
十年係由戶部議定

其現未回籍者若干戶。一年內能飭退及半者。免其議處。如不及十分之五。將州縣官罰俸一年。府州罰俸六月。道員罰俸三月。不及十分之三。將州縣官罰俸二年。府州罰俸九月。道員罰俸六月。不及十分之一。將州縣官降一級留任。府州罰俸一年。道員罰俸九月。仍令該州縣每年將各棚戶分別已滿限未滿限已回籍未回籍於年終詳細造冊。由該上司覈明報部查議。如有玩延不辦。徇隱姑容。並捏報虛數。冀免處分。經該上司查叅。將州縣官降一級調用。○又

議准墾地有復荒者將道員府州州縣官之加級紀錄削去督撫罰俸六月布政使罰俸一年道員府州降一級住俸州縣官降三級住俸俱勒限一年督令開墾如一年限內墾完准其開復限滿不墾完者督撫罰俸一年布政使降一級留任道員府州降一級調用州縣官降三級調用如前官墾過熟地後任官有復荒者督撫布政使道員府州州縣各官亦照此例議處○又議准地方荒地未開捏報已開及將墾過熟地捏稱新墾者州縣官革職府州降四級調用

道員降三級調用布政使降二級留任督撫降一級留任知情者不准抵銷不知情者准其抵銷○又議准州縣官開報新墾田畝以多報少以少報多或不將地畝之新舊荒熟分析明白以致有豫徵漏徵等事者俱降一級調用該管府州罰俸一年道員罰俸六月○又議准隱匿田地州縣官不行查出不及二頃者降四級調用二頃以上者革職知府直隸州知州不行查出不及五頃者降二級調用五頃以上者降四級調用道員不行查出不及五頃者降一級調

用五頃以上者降三級調用布政使不行查出
不及十頃者降一級留任十頃以上者降二級
留任督撫不行查出不及十頃者罰俸一年十
頃以上者降一級留任○十年

諭伯都訥理事同知文慶於該處民人王安等私開荒
地隱種千餘畝之多未經查出非尋常失察可比著
照部議革職嗣後如有似此失察私墾地畝之案即
照部議辦理毋庸票擬雙籤